

## **Nukarlerni tuluttut atuartitsinermi pitsaassutsimik nalilersuineq**

Ilisimatitsissut

J.nr.: 51.00-G01-334-18

Meeqqanut Atuarfeqarnermullu Ingerlatsivik – Pisortaq Helene Broberg Berthelsen / HEBE

### **Suliassamik eqikkaaneq**

Ukioq atuarfiusoq 17/18 aallarnerfigalugu Kommuneqarfik Sermersuup atuariini tuluttoortitsisarneq 1. klassimiit aallartippoq. Sapaatip-akunneranut ataasiarluni 1. klassimiit 3. klassimut atuartut tuluttoortarnerat akunnermik ataatsimik ilaneqarput.

Atuartut tuluttut pikkorinnerulernissaat, taamalu ilinniarnermi angusaqarluarnissaat siunertaavoq.

Matumani suliassami saqqummiussinermi nalilersuinerit ingerlanneqartussat tullerit siullersaraat. Immikkoortoq siullermi pitsaassutimik nalilersuisoqassaaq, immikkoortup tulliani, ukioq atuarfiusoq 2020/21-p naanerani, pitsaassutsimik annertussusaannillu nalilersuisoqassaaq.

Maanna kommunimi atuarfinni annertusisamik tuluttoortarneq - 1. klassimiit tuluttoortarneq - ukioq ataaseq ingerlanneqareerpoq. Pitsaassutsimik naliliineq tunngavigalugu, tassa atuarfikkuutaartumik ilinniartitsisut aalajangersimasut apersorneqarlutik peqataaffigisaanni, meeqqat atuarianni ukiup siulliup ingerlanneqarnera nalilersorneqarpoq.

Nalinginnaasumik akissutaasut ilagaat, klassini nukarlerni tuluttut atuartitsinerup aallartinneqarnera unamminalunilu pissanganarsimasoq. Atuartut tuluttoortarneq assut nuannaraat, akunnernilu atuartitsiviusuni assut kajumissuseqarlutillu tunniusimasimapput.

Ukioq atuartitsiviusoq 18/19 sioqqullugu ilinniartitsisut siusissukkut oqaatsinik ilinniarnermik aallartitsisarneq pillugu pikkorissarnermut peqataapput. Siusissukkut oqaatsinik ilinniarnermut tunngasunik assigiinngitsunik periutsinik ilinniartitsisut saqqummiivigineqarput. Siusissukkut tuluttut atuartitsinerup pilersaarusiornissamat ingerlatsinissamullu ilinniartitsisut ilisimasanik atortussanillu tuniorarneqarput.

Aningaasaqarnermut Inuusutissarsionermullu Ataatsimiititap 2018-imi novembarip ulluisa 8-ianni ataatsimiinnermini suliaq akuersissutigivaa Kommunalbestyrelsimullu inaarutaasumik akuersissutigisassanngorlugu ingerlatseqqillugu.

### **Inassuteqaat**

Aningaasaqarnermut Inuusutissarsionermullu Ataatsimiititap Kommunalbestyrelsimut inassuteqaatigaa:

- Ilisimatitsissut tusaatitut tiguneqassasoq

### **Suliassamik saqqummiussineq**

Ukioq atuartitsiviusoq siulleq annertusisamik tuluttoortitsisarnerup ingerlanneqarnera ilinniartitsisunut ilungersunarunilu unamminarsimavoq. Taamaattorli nukarliit klassianni atuartitsineq faginut atuartullu ataatsimoornerannut pissarsiffiusimasoq ilinniartitsisut amerlanerit isumaqatigiissutigaat.

Ilinniartitsisut oqaatigaat tuluttut ilinniartitsineq assut nuannaralugu. Ilinniartitsisunut naqqaniit

tuluttut atuartitsineq assut pissanganarsimavoq unammillernarlunilu ilikkagaqarnarluni. Atuarfinni tuluttoortitsisarneq pinnguarneq aallaavigalugu ingerlanneqarpoq, ilinniartitsisullu isumaqarput, tamanna atuartunit tigulluarneqarneranut pissutaasut ilagigaat. Atuartut tuluttoornissaminnut assut qilanaartartut ilinniartitsisut arlallit oqaluttuaraat, tuluttooraangamillu tunniusimalluarlutik piumasuseqartarlutik.

Atuarfeqarnermut Immikkoortortaqarfimmit pinnguarneq aallaavigalugu atuartut tuluttut ilikkariartornissaat siunertaasimavoq. Ilinniartitsisut atuartitsinissaannut killiliussat siamasissuupput, taamaalillutik atuartunut naleqqussaallutik namminneq atuartitsineq ingerlassinnaassavaat. Tamatumunnga najoqqutaqarani ilikkagassatullu anguniakkanik peqarani tuluttoortitsisarnerup aallartinniarnera ajornakusoorsimasoq ilinniartitsisut oqaatigaat. Atuartitsinermut piunasaqaatit suunersut nalullugit killiliussanik aalajangersaanissaq ajornakusoortissimavaat.

Naak aallaqqaataani qulartoqaraluarluni ilungersortoqarlunilu fagimik nutaamik taamatut periuseqarluni aallartitsineq pitsaasuusimasoq ilikkagaqarfiusimasorlu ilinniartitsisut oqaatigaat. Tunngaviit aallaaviginagit periutsit aallaavigineqarput, taamalu atuartut inissisimaffiat aallaaviginerusinnaasimallugu misigisimasimapput, taamalu atuartitsinerup pilersarusiornera ingerlanneralu kiffaanngissuseqarnerullutik ingerlassinnaasimavaat.

#### *Aaqqiissutissatut siunnersuut – suliatigut naliliineq*

Atuarfeqarnermut Immikkoortortaqarfimmit ilinniagassatut anguniakkat suliarineqarnissaat ilinniartitsisunit kissaatigineqarnerasoq paasiniallugu oqaloqatiginninnerit ingerlanneqarput.

Nukarlernut tuluttoortitsisartunut naapittarfissamik (forum) pilersitsinissaq sulissutigineqarpoq, tassani misilittakkanik atuartitsissutinillu avitseqatigiissinnaassapput. Ilinniartitsisut nammineq naapittarfissamik (forum) pilersitsissapput.

Ataavartumik nukarlernut tuluttoortitsisartut, atuartitsinerup ingerlannissaanut piareersimaniassammata, piginnaasassanik paasissutissanillu pisariaqartitaminnik tunineqarnissaat sulissutigineqartassaaq.

#### *Aningaasaqarnikkut sulisoqarnikkullu naliliinerit*

Soqanngilaq

#### *Inatsisitigut tunngavissaq allakkallu tunngaviusumik uppernarsaatitallit*

Atuarfik pillugu Inatsisartut inatsisissaattut siunnersuut nr. 15, 3. december 2012-imeersoq

#### *Ingerlariaqqinnissaq*

Ilinniartitsisunit kissaatigineqarpat Atuarfeqarnermut Immikkoortortamit tuluttoortitsisartut aallarniutigalugu ataatsimiittarnerat aaqqissuunneqassaaq, tassanilu nukarlernut tuluttoortitsisarnermut ilikkagassatut anguniakkat suliarineqarnissaat periarfissaassaaq. Ilinniartitsisut namminneq ilikkagassatut anguniagassat naammassineqarnissaat isumagissavaat.

Tuluttoortitsisartut ataatsimut naapittarfissaat (forum), tassani tuluttoortitsisartut misilittakkaminnik atuartitsissutinillu avitseqatigiissinnaasassapput. Ilinniartitsisut namminneq naapittarfissap aallartinnissaa isumagissavaat.

**Aningaasaqarnermut Allatseqarfimmit oqaaseqaatit**

Aningaasaqarnermut Allatseqarfik oqaaseqartinneqanngilaq.

**Innuttaasunik peqataatitsineq/Attaveqaqatigiinneq**

Soqanngilaq

**Ingerlatsivinnit allanit oqaaseqaatit**

Soqanngilaq

**Siusinnerusukkut aalajangernerit:**

*Aningaasaqarnermut Inuusutissarsiornermullu Ataatsimiititap aalajangernerera 8. novembari 2018-imeersoq:*

Inassuteqaatit akuersissutigineqarput.

*Meeqqanut Atuarfeqarnermullu Ataatsimiititaq aalangiinera, ulloq 5. novembari 2018:*

Inassuteqaatit akuersissutigineqarput.

**Ilannussat**

1. Annertusisamik tuluttoortarneq pillugu nalunaarussiaq - danskisut
2. Annertusisamik tuluttoortarneq pillugu nalunaarussiaq - kalaallisut